


KERWE-ZEITUNG

1975




Herausgeber: kerweborsch der Turnhalle

Verantwortlich: kerwe-komitee

Chefredakteur: kerwevadder

komitee

VERWE-SEITUNG
1932



Charakteristik: Kernwandaufbau
Verantwortlich: Kernwandaufbau
Herausgeber: Kernwandaufbau

Beim Schulze Adomm, do hod er gestonne,
es war en große, awwer kon gonz sollange
Ja... en Baukrone nennt ma jo des Dier
awwer de Schorsch Walter kon jo selwa nix defier
Der Krone hod beim Adomm seu Awwweit gemocht
jetzt muß er schnell zum Haus hod der Walter gedocht
Es es geschafft, es es gelunge,
de Krone es abgebaut un on de LKWgebunne
Eneu in de Laster un fort mit dem Krone, groß
denkt de Schorsch Walter un schun gehts los
Er fährt o un rollt e groß Stick,
de Laster geht aus, wos e Mißgeschick.
er denkt jetzt bleibt ma ach meun LKW noch stehn
isch muß doch zum Becker, denn do solls doch weitergehn.
Em Schorsch Walter dem es es noch pormol bassiert
off em Wäg horrer de Kann noch drei mol blockiert
In de Hauptstroß, vorm Hans seum Haus
do steid der Schorsch Walter aus seum Laster eraus
er seegt, jetzt nemme meer die Sach in die Hond
de Krone werd abgehengt un in de Hof neugerommt
Doch gesogt, gedo jetzt werds probiert
doch de Krone hod sich net vun de Stell geriert
er rífft die Nochbarn ringsum vum Door,
un seegt stellt eich des mol foor,
meer hon schun gedrigt mit aller Kraft
un howwe des Ding net vun de Stell geschafft
De Bensemer Wilhelm kimmt do des Wegs,
un freegt "No Schorsch Walter, wie gehts?"
De Schorsch Walter gugt en oh
un mohnt, ei on meun Krone es eijend wos droh,
de Wilhelm der Fuchs gugt sich die Sach genau oh
un seegt zum Schorsch Walter ei guge mol do
Du hoscht jo die Brems net off gemocht
Ei Walter, wie ich dich so steh hob seje, ...
hob ich mas glei gedacht.
De Walter seegt wos es ma donnjetzt wirrer bassiert
jetzt hommer uns vor de Leid wirrer gonz schee blommiert
Hunnert mol mindestens seun ma middem Krone schun umgezohe
un dodebei hon mer schun manch
doch die Brems die hon ma immer offgemocht
doch diesmol hon ma werklich net dro gedacht
Noch net e mol de Mick un de Helmut hons gemerkt
die Borsch, des derf doch beinoh net wor seu,
seegt de Wilhelm zum Schorsch
Ehr deet de Speiß besser mit em Schiffche noffdroche
do wert ehr befreit vun solche Plache

Un die Moral von der Geschicht:

Schorsch Walter vergiß die Bremse nicht

Un die Musik spielt un alles lacht

Oh Schorsch was hast Du mit de Brems gemacht

S I R E N E D R I C K E R

Jeden Sundog, des was jedes Kind
daß do in de Tornhall en Frihschoppe stattfind
do hon sich ach de Jochen un de Hermann getroffe
un hon schee oner minoner gesoffe
1 Glesje Weu des wor ne so wenig
sie honen Flascheweis bestellt un gelebt wie en Kenig
un noch e por Flasche Weu
fellt dem Hermann etwas eu
Un weil er die Feierwehr schon long hot off em Kieker
do wollt er glei on de Sirenedricker
Em Sirenepaul wollt er's nochmache
un sich hinner de Hecke ins Feistsche lache
Em Jochen, dem wor des net so geheier
won die was rausgriehe, des wert deier
Doch de Hermann denkt ein Mann ein Wort
un rennt schon in Richtung Feierwehrhaus fort
De Jochen steiht off un nix wie hinnerher
do sierer de Hermann der rennt wie en Bär
De Jochen helt de Hermann schnell eu
un segt zu em, geh mit zurick mer drinke noch e Flasch Weu
De Hermann lest sich des net zwamol soche
un so honse sich gejeseitig in die Tornhall zurick getroche
De Jochen segt ich muß mol offs Klo
do denkt de Hermann meu Zeit es jetzt do
Beim zwode Olaaf es es gelunge
do es de Hermann schon on die Eck gesprunge
De Jochen kimmt zurick, de Hermann es nemme do
de Jochen sterzt off die Gass, ei do rennt er jo
Die viele Autos hon en net driwwer gelosse
Jetzt greif ich zur Selbsthilfe, horrer beschlosse
Er steht off de Gass un rechelt de Vekehr wies kon onnern konn
Ja er liewe Leid des es holt unsern Hermann
"Bitbuwe" so horrer die Autofahrer geschennt
un schon wor er iwwer die Gass gerennt
Mittlerweil wor de Jochen ogerickt
un denkt, ei es der Kerl donn gonz verickt
Em Hermann seu Hose hon off Halbmast gehonge
des horrer alles seuner Rennerei zu vedonke
De Jochen erwischt en noch in letzter Minut
Ehr kennt mas glawe des war fer uns Feierwehrleid sehr gut
Vor laurer Dorscht seun se in die Tornhall gewetzt
un hon sich glei wirrer on de Stammtisch gesetzt
Sie hon noch gesoffe bis spät in die Nacht
un om nechste Doch hot koner mehr on des Debakel gedacht

Un die Moral lieber Hermann sag ich Dir
Drink de Weu net Flascheweis, drink lieber e Glos Bier
Un trotzdem spielt die Musik Dir dazu, un ich bleib ach dabei
Jetzt drink ma noch e Flascherl Weu

Des grüne Fejjelche

Beim Adam de Lydia un a beim Hermann
do hommer letscht gesche woss so alles bassirn kann.
E braud muß ins Haus hott die Lydia ausgeheckt
sunscht hott des mit dem Borsch iwwerhaapt koan Zweck.
Der seift blos nur noch un schafft nix meh
Die Lydia greischt nur noch ach oh weh.
E boor Stuwwe misse bei un des off de Stell
un rennt enoff zu de Sofie un des gonz schnell.
„Lieb Sofie du muscht boal raus aus unserm scheene Heische
unsern Hermann der helt jetzt boal hoam e schee Meische.“
Dere ehr Leit howwe meh Mojje als du Geld off de Kass
es dutt mer laad awwer du mußt jetzt raus off die Gass.
Die Sofie helt de Atem on
weil se doderooff iwwerhaapt nix meh soche kann.
Die oarm Fraa es glei in de Kerchwäg zu de Elsbeth gerennt
un hott dort „ferschter“- lich rungeschennt.
Die Elsbeth segt do koan ich goarnix mache
do muschte noch Gere. zu de Polizei off die Wache.
Mit denne glei telefonisch verbunne
un boalndruff honn sich bei de Lydia zwa Grine eugefunne.
Die Lydia wollt vunn denne zwa nix wisse
un hott se glei wirrer hochkonnt enausgeschmisst.
Do drense ehr Auto Richtung Kerchwäg zurick
un fohrn zu de Sofie un de Elsbeth des kloane Stick.
De Sofie steie die Dräne ins Aach
wo soll ich heit owend schlofe des gibt jo e Blach.
Die Elsbeth segt: „Mach der ko Sojje
du konnscht bei uns bleiwe wenigstens bis mojje.“
Lieb Fraa rejje se sich nur net off
mer holle de Pondmoschter der kläbt de Kuggug droff.
Der gure Moan es a boal kumme
un hott des grüne Fejjelche aus de „Dasch“ genumme.
Er hott des Ding off de Richseit mit de Zung obgeleckt
un hotts donn glei off die Dehr gegläbt.
Die Lydia hotts gesäe un wor gonz endsetzt
un es glei zum Hermann un em Adam gewetzt.
De Adam segt: „Mach der nix draus im Winter bau mer fer unsern
Windhund de Seistall aus.“
Die Sofie kehrt hoam wie noch ner gewunnene Schlacht
un schmeist sich in ihr Bett das es nur so kracht.

Do es de Hermann glücklich un froh
un fährt zu seum Meische un legt sich in de Stroh.
Des Meische des kenne mer all
des es der rassische Flipper in de Tornhall.
Uns felit sunscht nix onneres eu
doch Hermann sogs selwer,, wer konns ner onneres seu "

Un die Moral von der Geschicht

" Küsse im Suff die Blondine im Flipper nicht ,
es gibt andere Mädchen die warten auf dich."

Un die Musik spielt : Ob blond ob braun ich liebe
alle Flipperfrau.

Die mißglückte Heimkehr

Im Lercheck in Crumscht do es es bassiert
do hot sich es Dicksche fast selbst ruiniert
Em Pit seu Party wor geje mojudend verklunge
do hot sich es Dicksche longsom off die Homkehr besunne.
Er seegt es dud mer leid
ich muß ~~nehmlich~~ ~~möje~~ ~~früh~~ off die ~~Awweit~~ ~~ehr~~ ~~liowe~~ Leid
Er is off die Gass un homwerts gezohe
un als er beim Strohauer um die Eck es gebohe
do horrers gemerkt oh Weh un Schreck
meun Hofdorschlißel is jo weg
Un als er so vorm Hofdor steht
do iwwerlegt er jetzt wies weitergeht
Er denkt: meer howwe die gonz Nocht gefeiert un gesunge
doch jetzt muß ich jo ach irgendwie iwwers Hofdor kumme
Des Dor is doch ko 2 Meter hoch
do mach ichs holt dem Fosbury noch
Un als er glücklich is iwwers Hofdor gekumme
do horrer sich die Hausdeer vorge numme
Es Dicksche greift in seu Hosedasch un helt die Schlißel raus
jetzt awwer nix wie neu in des schene Haus
Doch des Schlißelloch kennt net groß genug seu
Jedoch grigt der mit seum dembische Kopp de Schlißel net neu
noch etliche Versuche do horrer offgeheert
damit er seu Leid im Haus net steert
Do horrer gedenkt ich leg mich jetzt irgendwo he
off ohmol sierer im Hof seun Fiat steh
Er segt des es meu Bett fer die restlich Nocht
do leg ich mich neu ehr Leid gut Nocht
Die Oma wollt ehn frihmojens wecke
doch sie konnt de Volker net im Bett endecke
Sie greischt Oh Weh un Schreck
Meun orme Dicke es jo weg
Sie rennt aus em Haus in die Nochbarschaft neu
wo konn donn nur unsern Dicke seu?
Um 9 wors Dicksche mittlerweil offgewacht
do horrer sich glei off die Awweit gemocht
Dehom wor die gonz Nochbarschaft in Aufruhr gebracht
denn alles hot nur noch ons Dicksche gedacht
Off omol hon se gemerkt des Auto es neme do
jetzt ruffe ma beim Dicksche im Betrieb mol o
Gesagt getan ein Mann ein Wort
er werts net glawe, es Dicksche wor werklich dort
Om Telefon horrer gonz glolaut zugegewwe
wos er die Nacht hot so alles getrewwe
Die Oma steht om Telefon noch blaß un kronk
Do bist de jo meun Dicke, na Gott sei donk!

Die Moral meun lieber Volker will ich Dir jetzt vezehle
Geh hom wonns Zeit es un dud die Nochbarschaft net Quele.

Un die Musik spielt dazu:

Dicker schlaf doch in keinem Automobil

Der Ballmarder

Ehr liewe Leit ehr wisst es all
in Crumscht gits e boar Fußballer des es en klore Fall.
Mer moant als die Kerl wern nur besoffe
fast koaner hott im Letzte Johr des Tor richtig getroffe.
Jeden Diensdog und Dunnersdog dränirnse wie die Dolle
un müsse die Bell oft ausem Nachbars Garde holle.
Genau om Sportplatz do wohnt soen Kerl
der klaut de Fußballer die gonze Bäll.
Bei de Hondballer do horrors noch net brobiert
weil er sich do ganz ferschterlich scheniert.
De Schorsch hot ach en feste Schuß
so daßer ah öfters in de Garde renne muß.
De Schorsch es schunn unner de Hecke dorchgekroche
do hott de Bruder schunn Lunte geroche.
Jetzt faßt er plötzlich den Gedonke
jetzt gehts vors Gericht do kenne sich unser Owelt zonke.
De Schorsch hott de Ball noch net richtig in de Finger
do kimmter schunn aus em Haus gewetzt wie en Ringer.
„Jetzt bisde droh mit deune schebbe Fies
de Ball leit jo schunn wirrer bei mer im Gemies.“
Noch em Nome fregt er ganz gedrunge
do segt er ganz ruhig: „Ich bin de Schorsch aus Bessunge.“
De Schorsch hott de Ball nemme ogeriert
daß em des gonze Maleer net nochemol bassiert.

Ehr liewe Leit die gonz Sach wär net bassiert
Hätt die Gemoa de Ballfong besser konstruiert.

Und die Moral von der Geschicht: In einer Großgemeinde
spart man an einem Ballfang nicht.

Un die Musik speelt fer die zwa Rinner
Er steht vorm Tor un ich dehinner.